

F. Anjur PROCEIT 2005, Rektor Hargai MPP

Majlis Perwakilan Pelajar Sesi 2005/2006 KUKUM diseru terus sensitif dan perihatin terhadap perkembangan ilmu pengetahuan dan penguasaan bidang teknologi maklumat di kalangan masyarakat awam khususnya yang membabitkan golongan pelajar sekolah rendah, demikian menurut Lt. Kol. Prof. Dato' Dr. Kamarudin Hussin, Rektor KUKUM semasa berucap di Program Celik IT Bersama KUKUM 2005 (PROCEIT) dengan tema: 'Cabaran Globalisasi: Informasi Tanpa Batasan' anjuran persatuan tersebut di Dewan Kuliah 2, Pusat Kejuruteraan KUKUM di Kuala Perlis pada 11 Jun 2005 lalu.

Program yang buat julung-julung kalinya dianjurkan oleh MPP Sesi 2005/2006 KUKUM itu telah dirasmikan oleh Yang Berhormat, Encik Bakar Saad, Ahli Dewan Undangan Negeri Kawasan Kuala Perlis. Ia membabitkan pelajar seramai lebih kurang 120 orang pelajar dari Sekolah Rendah Kebangsaan Seberang Ramai, Sekolah Rendah Kebangsaan Kuala Perlis dan Sekolah Rendah Kebangsaan Padang Besar Selatan.

Dato' Prof. Dr. Kamarudin berkata, sebagai pelajar di Institut Pengajian Tinggi, penganjuran program sedemikian adalah bukti nyata kepada keikhlasan dan keperihatinan mereka dalam membantu dan mencurahkan ilmu bagi membantu golongan pelajar yang mungkin kurang kepakaran, pengetahuan dan prasarana di dalam bidang teknologi maklumat itu sendiri.

"Pihak pengurusan KUKUM sentiasa dan akan memberi sokongan padu dan komitmen sepenuhnya di dalam apa jua program anjuran MPP KUKUM demi kebaikan bersama. Tanggung jawab sosial dan rasa keperihatinan terhadap penguasaan dan perkembangan ilmu pelajar di sekolah rendah khususnya di dalam bidang teknologi maklumat seperti ini harus dan perlu ada di dalam diri setiap warga mahasiswa-mahasiswi KUKUM".

"Golongan mahasiswa-mahasiswi adalah '*role mode*' atau contoh terbaik buat masyarakat. Sebagai golongan yang terpelajar dan mempunyai ilmu, penganjuran program seumpama ini adalah tepat pada waktunya. Ia sekurang-kurangnya dapat membantu para pelajar sekolah rendah ini memahami dengan lebih jelas tentang bidang teknologi maklumat. Program ini pasti akan menjadi satu pengalaman pembelajaran yang menarik kerana ia berbeza dari suasana pembelajaran di dalam bilik darjah", tegas beliau.

Mahasiswa-mahasiswi KUKUM yang terlatih telah dilantik sebagai tenaga pengajar di dalam program selama dua hari tersebut. Ia telah memberi tumpuan kepada dua subjek utama. Dalam subjek yang pertama para pelajar sekolah rendah tersebut telah didedahkan dan diajar tentang teknik-teknik menggunakan perisian '*Microsoft Word*' dan mengaplikasikannya dalam kehidupan sebagai pelajar. Ia kemudian diikuti dengan cara-cara melayari internet serta bagaimana memindah turun sesuatu maklumat yang dikehendaki.